



Fregores

Alcunta noes in curto dal paes e da fora

Trope marade

Nuia da fei: no se vâ adora a mudâ chi numere. I marade de Covid-19 in Anpezo i è ancora masa, da alcunta setemanes. El capocornun Gianpietro Ghedina Crepo el bete fora, in ciout de doi o tre dis, cuanta parsones positives che i à ciatâ e 'l ultimo numero, lues ai 22 de marzo, 'l ea 55. In ca noma un de manco de chi 56 de vendres de ra setemana pasada. Calchedun vien de meo, ma de oure i se mara. Dapò 'l è da sontâ outra 29 parsones, sarades in ciata, parcè che 's è stades pede a un marâ. In duto, in Anpezo se conta 84 parsones: masa, inze un paes come el nosc. Coscità son dute che vardon ves r'ousciuda, ra stajon che ra podarâ me fei nasce danoo, ma col festidè che algo de sta stranbaria me tocjarâ se 'l portâ drio anche d'istade, fin cisâ can.

Pian col loo

Articole su par ra gâsetes, documentarie par television, libre, conferenzen, massa farza su par i social: ancui se parla tropo del loo. I bacane che arlea besteam e vede el loo come un nemigo; conpain i cazadore, che i se vede portâ via i 'sot selvateghe. Par trope ane Pian de Loa 'l è stâ un toponimo, da se pensâ de tenpe indalonsa da nos, e ancui 'l è danoo de atualità. L è finamâ ci che à festide a caminâ par un troi, o 'na strada fora via, che no se sâ mai che soue fora ra bestia, a se 'l magnâ. Storia e cronaca, scienza e lejendes: se bicia duto inze 'l laviçio, da fei un menestron. Cemodo che suzede de spes, o 'l è bianco, o 'l è negro: calchedun peta ra mas, parcè che sta bestia r'è danoo par i nostre bosche, calchedun inzeze prezipito, parcè che 'l è ruâ danoo ch'el diou che copa e maza, sporco de sango. Inzeze el loo el no n'è bianco, né negro, ma 'l è grisc. Par se sconde meo.

Sode par ra vijinanza

El Comun de Anpezo 'l à betù 40mile euro par ra organizazion de ra granfondo Dobbiaco – Cortina, che i aea da fei ai 23 e ai 24 de jenaro. Sta ota i aea betù ra gares doa setemanes ignante del solito, par via de i Campionate del mondo de schie, da i 8 a i 21 de febraro. Chi dis 'l è stâ 'na gran guera, 'l ea festide par ra laines, e coscità i à abbi da ingramâ tre gares el medemo di, domegna ai 24 de jenaro. Pi che sec, i no n'â podù ruâ in Anpezo, par ra laines in Val de Landro, e coscità i atletes i è moeste e i è ruade a Toblach, intrâ 'l aeroporto de i melitare e ra Nordic arena par i schie da fondo. I ea de poche, par via de ra marescia Covid-19, e 'l è stâ difizile fei duto, ma i è sude adora. Coscì el Comun de Anpezo 'l à vorù conpari, anche se sta ota i no n'è ruade in stajon, agnò che i aea pareciâ duto polito. Sarà par un outro an.

Nuia foula par el Cai

Ra sezion de Anpezo de el Club alpin italian ra fese saé a i so sozie che, par via de ra marescia Covid-19, no se podarâ fei ra foula granda, cemodo che se sore fei ogni an, el mes de marzo. E no sarà gnanche ra zena, par se ciata e fei cuatro ciacoles in bona armonia. Coscità i domanda i a sozie de fei ra tesera, ignante de i 31 de marzo, par no perde ra ascurazion Cai. Se pò pasâ inze 'l ufizio Info point, inze 'l Comun Vecio. Sul sito Internet del Cai Cortina se ciata duto scritto.

Curto 'l è bel

Se ve sâ bel vardâ el cinema, mangiare i film in curto, no podè ve perde chel che i mostra inze chesta edizion numero 16 de el festival Cortinametraggio: el meo de i film curte che 'l è in Italia ades. Sta ota i tocia fei duto da indalonsa, par sta marescia, e coscità chi curte no s'â vede ca in Anpezo, al cinema, ma tocia i vardâ su CanaleEuropa.tv o sedenò su MYmovies.it agnò che i stajarâ par 'na setemana intiera, dapò del festival, che el fenisce con domegna, ai 28 de marzo. Ste dis s'â beleche podù vede e scotâ cache parsonimo conosciâ del cinema talian, da Claudia Gerini a Nancy Brilli, a Milena Vukotic, a ra rejista Francesca Fabbri Fellini, neoda de Federico, che r'â portâ el so laoro 'La Fellinette', par se pensâ de so barba e parâ de el. Pi che see 'l è un grun de soen, atore rejistes, che i pò se fei conosce propio con chiste festival, cemodo che 'l è suzedù i anes pasade, par dapò cresce.

Varentes toâte

I sogadore de r'Haifo Cortina i è sude adora a pasâ inze i playoff de ra Alps hockey league. I scomenza sabeda, ai 27 de marzo, con chera de si inate polito, fin che se pò, con rispetto par dute, ma senza festide par negun. Sto an, che 'l è coscità difizile fei duto, sarade via, inze 'l stadio Olimpico no pò si ra sènte, a vede ra partides: coscità s'â nafre pardu chel che leaa ra squadra al paes, a ra sènte. E par fortuna che almaco s'â podù suâ, parcè che 'l an pasâ d'outon somea che i vorece sarà su duto, no fei gnanche i campionate. L an pasâ d'istade no s'â gnanche fato el Torneo Ladin de i anes ignante, con chi da Fascia e da Gherdeina. Ades tocia vardâ inaante, a ra stajon che vien, da sperâ che ra vade meo, che se pode tornâ a ra vita da dagnadi.

